

KONTROL MOZIOA

TXOMIN ENEA AUZOAN BEHARREZKO EKIPAMENDUAK JARTZEARI BURUZKOA

Jon Markel Ormazabal Gaztañagak, EH BILDU udal taldeko zinegotziak, Udaltzaren Organo Araudiko 98. artikulua oinarri, mozio hau aurkezten du, Udaltzaren azter dadin. Mozioa 2024ko urriko Pertsonentzako Zerbitzuen Batzordean aztertutako interpelazioaren ondorioa da.

JUSTIFIKAZIOA

2024ko apirilean jakin zen Txomin Eneako Kristobaldegi komentu historikoak ateak itxiko zituela. Eraikin horrek auzoak dituen azpiegitura eta ekipamendu beharrak asetzeko aukera proposa eskaintzen zuela iritzita, Txomin Eneako bizilagunak eta Lanberri auzo elkarteak *Kristobaldegi Auzoarentzat* dinamika abiatu zuten.

Besteak beste, 2024ko uda hasieran inkesta zabaldu zuten bizilagunen kezka, aldarrikapen eta behar nagusiak identifikatzeko, eta irailean jakinarazi zituzten emaitzak. Inkestak parte hartze handia izan zuen, 433 pertsonen izenean 144 erantzun jaso zituzten, eta auzotarren behar nagusiak azpiegiturei lotutakoak zirela argi geratu zen. Azpiegitura publikoen falta nabarmentzen zen, baita Donostiako Udalak egindako promesak ez bete izana edo Kristobaldegi hutsik geratzeak irekitzen zituen aukerak ere.

Horrela, “urrian hutsik geratu zen Kristobaldegi komentuaren erosketari buruzko negoziazioan sartu behar duela eta erosketa publiko bat egin dezala” eskatu zioten Udalari; izan ere, hainbat hedabidek zabaldu zuten eraikineko jabeek “udalari zein aldundiari eskaini ziotela eremua”, jabetza horiek erosteko interesa izango balute.

2024ko urrian horri buruz galdetu genion alkateari udal batzordean. Bertan adierazi zuen Aldundia jabeekin negoziatzen ari zela, baina Udalari legokiokkeen eremuaren baldintzak ez

zirela egokiak, besteak beste, uholde-arriskuko ingurune batean dagoelako. Hala ere, negoziaketak eman zitzakeen aukera desberdinak aztertzen jarraitzeari ez zion atea itxi.

Bitartean, Txomin Eneako bizilagunek lanean jarraitu dute eta aurtengo otsailaren 5ean eskari bat erregistratu zuten udaletxean, 1.045 bizilagunen sinadurarekin. Ekimenaren berri emateko agerraldian, Lanberri auzo elkarteko kideek honakoa adierazi zuten:

“Auzoan urte gutxian biderkatu egin da biztanleria eta azpiegitura sozial aldetik bete gabeko promesak besterik ez ditugu oroitzen. Zain egotez nazkatuta, gure ahotsa entzunaraztea erabaki dugu eta udalari esaten diogu joan den urrian hutsik geratu zen Kristobaldegi komentuari erostetari buruzko negoziazioan sartu behar duela eta erosketak publikoak egin dezala, beste askotan egin izan duen moduan. Eraikin historiko horrek auzoaren beharrei erantzun behar die, asko baitira eta askotan ari gara esaten.”

Bada, Txomin Enea auzoaren ezaugarriak ezagututa, sinadura kopurua zinez esanguratsua eta aintzat hartzekoa da. Donostiako Udalaren datu basean, Txomin Eneari dagokion informazio demografikoa Loiolako eremu zabalagoan jasotzen da, eta horren arabera, 6.286 lagun bizi dira eremu horretan.

Hala ere, aste honetan bertan jakin da Kristobaldegi ez dela auzoko ekipamenduak hartzeko izango. Udal batzordeetan lehenik, eta Tokiko Gobernu Batzarraren osteko agerraldian bigarren, Eneko Goia alkateak adierazi du Donostiako Udalak ez duela eraikina erosi. Komentu zaharraren jabeekin bi bilera egin ostean hartu dute erabakia: batetik, eraikina beraren egitura hondatuta dagoelako, urak askotan hartu baitu; eta bestetik, jabeek egungo eraikina eraitsi eta beste bat eraikitzea aurreikusten dutelako. Aldi berean, Eneko Goia alkateak adierazi du ez duela zalantzan jartzen Txomin Enean ekipamenduen beharra, eta, anbulatorioarentzat onartutako kokapen-aldaketarekin, hasiera batean xede horretarako erreserbatutako lurzorua auzoarentzako zuzkiduretarako bideratuko dela.

Hamarkada eskas batean Txomin Enea auzoa asko hazi da, biztanleria biderkatu egin da, baina ez auzo batek bizigarri izateko beharrezkoak dituen ekipamenduak. Bizilagunek denbora daramate auzoaren beharrak asetzeko azpiegitura publikoak eskatzen, eta azken urte eta bereziki hilabete honetan sortu den mugimenduak behar bezalako erantzun bat premiatzen du.

